

■ **REGENZA**

Co impunder ils meds supplementars per la cultura?

(anr/gc) L'emna passada ha il cussegli grond tractà il preventiv 2014 ed augmentà en quel connex l'import tar la cultura per 500 000 francs. Immediat han ins pudì leger che quels meds supplementars sajan destinads per il Festival Origen, il Teater municipal da Cuira e l'Orchester sinfonic da chombra grischun.

Ier ha cuss. gov. *Martin Jäger* precisà – sin dumonda – co quel mez milliun vegnia applitgà. En il decurs da l'auter onn decidia la regenza co reparter quels meds finansials. Sa chapescha che las organisaziuns culturalas professiunalas numnadas vegnian resguardadas – ma na

sulettamain ellas. Era per autras prestaziuns culturalas – sco la Opera Viva a Sursaiassa – dettia i dapli sustegn.

La taglia pauschala porta 50 milliuns al Grischun

Sin la dumonda, schebain la regenza a tegnia vi dal princip da far pajar taglia tenor entradas punctuescha cuss. gov. *Barbara Janom Steiner* ch'il Grischun fetschia quai, mo haja introduci e lubì – sco anc auters chantuns – ina taglia pauschala per tschertas persunas ritgas. Quella portia al chantun ca. 50 milliuns francs ad onn, entradas fig bainvegnyidas.

En il parlament federal a Berna vegn l'iniziativa, che vul abolir la taglia pauschala, deliberada da preschent. Quella vegnia alur davant il pievel. Sche tala vegnessia acceptada stuessia il Grischun ponderar tge far.

Sco chantun muntagnard saja el simpelmain dependent d'ulteriuras entradas e sustegnias perquai vinavant la taglia pauschala.

Per la davosa giada ha cuss. gov. *Hansjörg Trachsel* timunà ier sco parsura l'inscunter dal mais da la regenza cun ils preschentants dals meds da massa. Cun 2014 entschaiva ses davos onn en la regenza.